

TARIKH : 4 OKTOBER 2023
AKHBAR : BERITA HARIAN
MUKA SURAT : 22

Ekonomi Malaysia kekal berdaya tahan

Ekonomi Malaysia kekal berdaya tahan

Pasaran buruh bertambah baik sokong keupayaan isi rumah

Oleh Mahanum Abdul Aziz
mahanum_aziz@bh.com.my

Ekonomi Malaysia kekal berdaya tahan dan aktiviti domestik akan terus menyokong ekonomi pada 2024, demikian menurut Gabenor Bank Negara Malaysia (BNM), Datuk Shaik Abdul Rasheed Abdul Ghaffour.

Beliau berkata, keadaan pasaran buruh, terutama pekerjaan dan gaji terus bertambah baik dan ia adalah faktor penting yang menyokong keupayaan isi rumah untuk berbelanja.

Katanya, pelaburan sektor swasta dan awam pula masih utuh dan faktor sedemikian akan terus menyokong ekonomi Malaysia pada 2024.

"Selain itu, ekonomi juga akan mendapat manfaat daripada pemulihan beransur-ansur dalam kitaran teknologi dan pemulihan dalam permintaan luar," katanya

pada Persidangan Antarabangsa Jenayah Kewangan dan Pembinaan Keganasan (IFCTF) ke-13, semalam.

Abdul Rasheed berkata, Malaysia juga bernasib baik tidak menghadapi cabaran inflasi yang teruk seperti yang dilihat dalam ekonomi lain.

Beliau berkata, selepas mencapai kemuncaknya pada separuh kedua 2022, inflasi teras terus menurun kepada 2.5 peratus pada Ogos tahun ini, sejajar dengan harga komoditi global yang lebih rendah dan keadaan bekalan dan permintaan yang bertambah baik.

"Kami menjangkakan inflasi akan terus menurun sejajar momentum kenaikan harga yang perlahan. Kami akan terus memantau potensi risiko terhadap prospeknya yang timbul, terutama daripada perubahan kepada dasar domestik mengenai subsidi bahan api," katanya.

Ambil kira prospek inflasi

Abdul Rasheed berkata, ketika ekonomi Malaysia bangkit daripada pandemik, Jawatankuasa Dasar Monetari (MPC) BNM melaraskan dasar monetari secara beransur-ansur sejak Mei 2022, dengan mengambil kira prospek inflasi dan pertumbuhan domestik.

Beliau berkata, Kadar Dasar Semalaman (OPR) ketika ini berada pada paras prapandemik sebanyak 3.0 peratus dan dasar monetari kekal menyokong ekonomi.

Namun, katanya, MPC kekal berwaspada dengan keadaan yang berubah dan kesannya terhadap inflasi domestik dan juga prospek pertumbuhan.

Melangkau jangka masa terdekat, Abdul Rasheed berkata, negara harus menyasarkan ke arah mengekalkan pertumbuhan jangka panjang, sambil meningkatkan kualiti hidup untuk semua rakyat Malaysia.

Beliau berkata, pembaharuan struktur memainkan peranan penting dalam mencapai matlamat itu dan kerajaan baru-baru ini sudah melaksanakannya dengan melancarkan Rangka Kerja Ekonomi MADANI, Pelan Induk Perindustrian Baharu 2030 (NIMP 2030) dan Pelan Hala Tuju Peralihan Tenaga Nasional (NETR).

Katanya, selain mengutarakan objektif ekonomi negara dalam Rangka Kerja Ekonomi MADANI, ia juga menekankan tadbir urus sebagai elemen utama dalam mengemudi pembaharuan yang diperlukan, merangkumi integriti, ketelusan dan juga akauntabiliti.

